

4. maj 2022

UPA2022/76

Inatsisartut aalajangiiffigisassaattut siunnersuut Naalakkersuisut peqquneqassasut nalunaarusiamik sanassasut, innuttaasut kærftimik suussusersineqarnikunut imaluunniit nappaat inuunermik ilorianartorsiortitsisinnaasumik peqaraanni aningaasatigut toqqissisimanissamik qanoq qulakkeerinniffigisinnaanerigut. Nalunaarusiaq nappaammik eqqugaasut aningaasatigut eqqugaanermi misigisimasaannik imaqassaaq aammattaaq nappaammik eqqugaasimasup ilaquataasullu aningaasatigut ikiorserneqarnissaanik periarfissaasa maleruagassaanni aporfiusut periarfissaasullu. Nalunaarusiaq UPA 2023 paalitsinnagu Inatsisartunut tunioranneqareersimassaaq.

(Inatsisartunut ilaasortaq Nivi Olsen, Demokraatit)

Siunnersuuteqartumut qujavugut.

Siunnersuut pillugu imaattumik Siumumiit oqaaseqarfigissavarput.

Siullermik ilaquitariit nappaassuarmik eqqugaasimasut siunissamilu qularnaatsumik eqqugaasussat assigiinngitsorujussuamik oqaluttuassaqarnerat atugassaqarnerallu eqqumaffigisariqarparput.

Nunatsinni nunaqqatigut nappaassuarmik nalaataqartut annaasaqarsimasullu misiginneqatigivagut nappaatertillu ajunnginnerpammik qaangilertornissaanik kissaallugit.

Nappaassuaq inuunermi sutigut tamatigut kalluaasartuq ilisimalersimavarput, suliniutit nappaassuarmik akiuniarnermut akissarsiaqanngikkaluarlutik suliniuteqartut katersuiniarneranni tamatta isiginnaartarpagut tusarnaartarlugillu qanoq atukkaminni imaannaanngitsumik nalaataqartaqartatut. Taamatut suliniuteqartut nersorpagut suliarfik suliarilluarmassuk nunatsinni aamma tamanna pinngitsoorneqarsinnaanngilaq.

Aaliangiiffigisassarput qanorluunnit sammivilerniaraluaaraanni oqaluuserinerani misigissuseqarnanngitsuunngilaq taamaalilluni aamma qanorluunnit oqaatigisat sammivileraluarpata misigissusunik qisuartiartitsisussaapput.

Tamanna oqaatigireerlugu inuiattut sutigut tamatigut susoqartillugu pisortat isumaguassappatigut aningaasat atorsinnaasagut naammanngittuaannartussaapput. Taamaattumik nammineerluta aningaasatigut immitsinnut taamatut atugaqaratarsinnaanitsinnut sillimaniarnissarput aamma pisariaqarnera akueralugu eqqanaartalernissarput inuttut ilaquitariittut suliassatta ilagivaat. Taamaaliussaagut atugarisagut nammineq akisussaaffigalugit nalaassinnaasagut piareersaffigutsigu pisariaqartitsivissunut aningaasat atornerqarsinnaalissammata.

Siunnersuuteqartup qulakkeerniarpaa inuit ataasiakkaat aamma ilaquataasut nappaassuarmik eqqugaasimasut aningaasatigut toqqissisimanissaanik qulakkeerinninniarnissaaq.



Aliaangiussassarput ilisimasaqalernerunissatsinnut taamaalilluta pitsaanerusumik aaqjissuussinissamik ammassisinnaavoq.

Nappaassuup inuunermik naliginnaasunngorsimasunik mumisitsilluinnartarnera eqqugaasumut ilaqutaanullu annertuumik kingunerluttarnera paasillugu akueralugulu, inatsisitigut aaqqiinikkut nalaataqartut iluaqutigisinnaasanik nassaartoqarsinnaappat Siumumi suleqataaffigissavarput.

Tamanna peqqutigalugu siunnersuuteqartoq taperserlugu siunnersuut ataatsimiititaliamut susasaqartumut ingerlateqqinnissaa innersuussutigivarput.

Hans Peter Poulsen, Siumut